

Incumbensa Caduff concernent il program d'incubatur per il Grischun

Per l'existenza d'ina economia publica è in current cuntinuant d'innovaziuns indispensabel. Senza questas innovaziuns na po in'economia publica cun in aut nivel d'enconuschientschas in summa betg exister en la concurrenza internaziunala.

La promoziun da l'economia dal chantun Grischun, sco che nus l'enconuschain oz, n'è betg buna da promover e da sustegnair en la dimensiun pretendida l'innovaziun en il chantun Grischun. Il focus da la promoziun da l'economia è oz il sustegn da las interpresas existentas sco er la domiciliaziun da novas interpresas. Il sustegn d'interpresas giuvnas innovativas manca per gronda part. Ina pussaivladad per sustegnair interpresas giuvnas èn uschenumnads "incubatur".

Da princip èn incubatur – ord la perspectiva da la politica economica – instituziuns che vulan crear in ambient positiv per interpresas giuvnas e che sustegnan ils fundatur a realisar lur projects. In ambient positiv per incubatur vegn creà tras ina maschaida da prestaziuns en ils secturs da l'infrastructura da las interpresas (p.ex. locals da biro), dal support dals affars sco er d'ina rait da contacts, tranter auter cun finanziaders.

La derasaziun creschenta e l'impurtanza pli e pli gronda dals incubatur sa mussa er en lur dumber. Sin l'entir mund è il dumber d'incubatur stà l'onn 1990 circa 1000. L'onn 2000 devi gia circa 3200 talas instituziuns, da las qualas mintgamai in terz eran domiciliadas en ils Stadis Unids da l'America ed en l'Europa. L'augment è stà progressiv cunzunt durant ils onns suenter la crisa finanziala ed economica. Uschia è il dumber d'incubatur creschì da 5000 l'onn 2007 a 7000 l'onn 2012.

Ils incubatur pon vegnir repartids en instituziuns profitablas (for-profit) e betg profitablas (non-profit). En connex cun las instituziuns publicas surpiglian citads, regiuns, chantuns u instituziuns sumegliantas la responsabladad per la gestiun. Incubatur academics vegnan endrizzads d'universitads, da scolars autas u d'instituts da perscrutaziun. Tuts dus tips d'incubatur, tant ils publics sco er ils academics, èn incubatur betg profitabls.

Incubatur privats ston plitost vegnir attribuids al sector profitabel. Els sa basan sin personas privatas, sin instituziuns e sin interpresas. Incubatur ch'appartegnan ad ina interpresa han lur origin en ina interpresa e vegnan administrads da quella. Incubatur independents privats èn sut la responsabladad da personas privatas u er da gruppas da personas e d'interpresas, senza che l'incubatur stoppia vegnir attribui directamain ad ina tsherta interpresa. Ultra da quai datti er furmas maschadadas, tar las qualas instituziuns dal maun public e privat collavuran en in incubatur.

Las sutsegnadras ed ils sutsegnaders incumbenseschan la regenza d'examinar il concept d'incubatur per il Grischun e da suttametter al cussegl grond ils resultats dals scleriments en ina furma adattada.

Cuira, ils 14 da favrer 2018

Caduff, Dudli, Albertin, Berther (Mustér), Blumenthal, Buchli-Mannhart, Caluori, Casanova (Glion), Casty, Casutt-Derungs, Cavegn, Caviezel (Cuira), Cramer, Darms-Landolt, Dermont, Dosch, Epp, Felix (Haldenstein), Foffa, Geisseler, Jeker, Joos, Kappeler, Kollegger, Lorez-Meuli, Mani-Heldstab, Märchy-Caduff, Müller, Niggli-Mathis (Grüsch), Papa, Paterlini, Pedrini, Peyer, Pult, Sax, Schneider, Stiffler (Tavau Plaz), Tenchio, Tomaschett (Breil), Tomaschett-Berther (Trun), Zanetti, Berther (Segnas), Lombardi, Stäbler